

Opur Adire Wa Apol Age Agiom **Atimoti** **Bho** **Otighom**

Atimoti aro ma odi oni ibaraguma wa atuan Apol ibom bho. Kadin Atimoti aro ma wemu asosi Efisos ma odi obhel, sa Apol aruom ina ma ogi ka omarameni ikarabh atughumeni ya da asosi bho (1 Atim 3:4). Apol abem ologi ma ogi ka ozuan Atimoti (Atim 3:14, 15; 4:13), yaa, ina adia age ma alebh onon agiom Atimoti, ma onigha agai akikiom ya igboloma ma ogir asosi bho, ma aguo ola okpomeni ologi ta Atimoti, na okikiom oyo, wa aro ma okubh wemu asosi bho. Apol abeton ekpo abar abar ise abhin akikiom Atimoti. Ina abaram na agai idiar ya ikpe ma ogbo arumu irileghom asosi, na da akokodian ikol ologhom, boka abhin inye amarameni ma atughumeni igunugha, na aguo orughan adien kere kere rebu anwunom ya odi da asosi bho. Alebh onon aguban ola ulebh ugiom Atimoti kukum, yaa adizo ikikiom bho odidia na elogh aguo na enigha ma ogbo arumu irileghom rasosi adama adidon. Yagiagai, alebh doyo onon bha ogbara adire ola obhin orileghom, na ola obhin osibhom itotogi asosi.

Arumu idiar ya uge bho

Otighom (1:1-20)

Ighaghana ya igboloma ma atughumeni

igunugha (2:1-15)
 Akikiom ya igboloma ma asiseiny na ikol (3:1-16)
 Idiar ya igboloma ma odoni ikei na ogbo itotogi (4:1—5:25)
 Rekal akikiom na ogir bho (6:1-21)
 Ogir ologhom Akraist na ighaghana wa Apol
 aghaghana ma Aṭimoti bho.

Ibheleguma

¹ Alebh onon adua da aguo dami Apol, oniogir ta Akraist Azizos aru, da ito ta Aziba Witenemeni diyar, na Akraist Azizos wa ebem ologi diyar bho,
² ma onigha oyom Aṭimoti, agai onyi dami da ologi imara bho. Eneghe, okpon igbirigbir, na ekima ta Aziba Owede bho na Akraist Azizos Wanwuna iyar bho ero na anwa.

Akikiom ya igboloma ma atughumeni igunugha

³ Aguo ami akpomeni ma ologi doynom ma oro da Efisos, igiel bho ami na aten na agi da Amesidonia bho, ma aguo ola anwa ta aghaghana ma ogbo ya na etughumeni ma atughumeni igunugha bho ma oweleman ogir okua.

⁴ Gba maa, awa eweleman rasugbagba ezin oto na idudul ibom rowede dawa ya ekunuguma orodo bho, ya na emutiom rakuanan kukum, ya ologh do ma aguo enigha ma anwunom ma orugh aghudum ologi imara ta Aziba bho.

⁵ Ezin abar wa utun uto ma ito inyen bho bha, odighi aguo ola odi ta abhin da ologi ebabala, na obebi eloghoman, na agai ologi imara atulan odi.

⁶ Idi ogbo na ebaron edua da odighi idiar inyen egi ka edigh da ibhelebbhel afugh.

⁷ Awa na ebhorogh oten itughumeni ma atughumeni oloko bho, yaa imughonyan do ma iya awa na efugh, na ezin asugbagba ya awa na ebhin alukpo ologi na egba bho.

⁸ Iyar ologhom maa oloko bho abhon, kugba maa orughom aguo asoran bho.

⁹ Iyar ologhom nyen maa, udin do ma anwunom ya na erugh ya igielake omution oloko bho, yaa udin isorogi ma rokpe, na iwian ma radilade irileghom, na ighel ma Aziba, na idighi ma ikarabh, na ogbo ya na erugh adol itei, na ogbo ya orugh do ma adol igielake, na ogbo ya abar ola imara orodo, na ize ma ronweni na rowede, na ize ma anwunom,

¹⁰ na idemema, na ilobhiri ya na ekoduom ilobhiri, na anwani ya na ekoduom anwani, na ibua ma anwunom, na igba ma igunugha, na ronyoba igunugha, na ogbo ya na ewian agai atughumeni bho,

¹¹ ya idua da ibebi asugbagba ya igboloma ma isosorogian ta Aziba Itutumeni iru, sa ina abeton alogh da aguo dami bho.

Enegha wa Aziba anigha ma Apol bho

¹² Ami na asebh Akraist Azizos Wanwuna diyar, wa abigh ma ami akpe sa ason ami adighom da ogir oyo bho.

¹³ Da obhel ola na aten, ami ifugh ghan afugh ibasi agboloma ina, sa ami igbikimeni ma anwunom doyo, sa ami ikiri ina. Kukum eka, Aziba akpon ami ma igbirigbir aguo ami ologhom

do_ maa_ ami_ na_ agir_ ikarabh_ bho_ ezin_ bho_ ami_ imara_ do_ ina_.

¹⁴ Sa_ Wanwuna_ diyar_ abhin_ da_ eneghe_ doyo_ anigha_ ami_ ma_ ologi_ imara_ na_ etulan_ ya_ iwo_ da_ Akraist_ Azizos_ iru_ bho_.

¹⁵ Onon_ agai_ onuokpe_ ola_ akpe_ ma_ anwunom_ oda_ obhin_ maa_ "Akraist_ Azizos_ aru_ ma_ isen_ emaranwunom_ bho_ ma_ otenemeni_ idighi_ ma_ ikarabh_." Sa_ ami_ iro_ ma_ odighi_ ma_ ikarabh_ wa_ igurom_ ipu_ bho_.

¹⁶ Yaa_ Aziba_ akpon_ ami_ ma_ igbirigbir_ ma_ aguo_ ola_ Akraist_ Azizos_ ta_ arughom_ ami_ aguri_ ma_ aguo_ elegh_ amane_ doyo_ ebla_ aguo_ ami_ iro_ ma_ odighi_ ma_ ikarabh_ wa_ agurom_ apu_ bho_ eka_ Obha_ na_ aleriom_ aguo_ idiar_ ta_ ero_ egboloma_ ma_ ogbo_ ya_ da_ oguman_ sa_ ta_ emara_ ina_ sa_ ta_ etei_ aghudum_ kidudul_ bho_.

¹⁷ Isen_ bha_ edim_ na_ isosorogian_ ero_ enigha_ ma_ Olilema_ wa_ ka_ kidudul_ bho_ wa_ omugh_ do_ bho_ wa_ obigh_ do_ ma_ adien_ bho_ wa_ ina_ kukum_ aro_ ma_ Aziba_ gai_ bho_ tutun_ kidudul_ Aro_ ma_ okua_.

¹⁸ Onyi_ dami_ Atimoti_ ami_ na_ ato_ ma_ ito_ inyen_ na_ anigha_ nyam_ ma_ omuzoghodiom_ iwowa_ ya_ uwa_ ugboloma_ nyam_ da_ obhel_ ola_ na_ aten_ bho_ boka_ igiel_ anwa_ iruruan_ anwa_ amar_ awe_ ma_ egham_ bho_.

¹⁹ Sibhe_ ma_ eloghoman_ doynom_ ma_ akparameni_ ma_ anwuna_ ma_ ologi_ ehabala_ Idi_ ogbo_ ighel_ iye_ sa_ iweleman_ onagha_ iya_ ologi_ na_ agba_ Ebula_ okua_ sa_ ipie_ ma_ ologi_ imara_ dawa_.

²⁰ Ahimenios_ na_ Alekzanda_ bha_ idi_ ogbo_ ya_ na_ egir_ okua_ da_ esadio_ dinyin_ Ami_ na_ abeton_ awa_ alogh_ da_ aguo_ ta_ Eru_ bho_ ma_ ogbikimeni_ boka_

awa eweleman afugh ibasi ogboloma Aziba.

2

Akikiom ya igboloma ma agu osiseiny asiseiny

¹ Opu abar bho, ami na akikiom inyin maa, ipuru ma idiar ya inyin na obhorogh bho, ma esiseiny, ma emara ma eni, ma esebh Aziba ma egboloma konikoni.

² Isiseinye ma enigha ma Arulilema na ipan ogbo ya odi da adilade ito, boka iyar orugh aghudum ebokum na ekima, na oghilan Aziba, na orugh aghudum edim.

³ Osiseiny okonon abhon, sa adigh ologi ma Aziba Witenemeni diyar,

⁴ wa na abhorogh konikoni ma oten na ologhom agai agai bho.

⁵ Ezin bho onin Aziba na onin omara ma enie kukum odi da esadio anwunom na Aziba. Ina Akraist Azizos,

⁶ wa anigha ma ozu doyo ma obhin ota ebla anwunom, sa aro ma elegh ola umutiom da obhel wa uto bho.

⁷ Obha ezin bho uson ami ma oro oni-ogir na oni atughumeni ola otughumeni onuokpe imara ologi na agai onigha Ibhebbian bho. Ami na agba ma yagiagai, igunugha do.

⁸ Ami na abhorogh aguola kesi kesi ilobhiri anwunom na esiseiny asiseiny, awa ebegion aruguo ehabala egiom anyu, aro ma ola awa ko ogurumian do ma rologi, bodo ko okuanan do ma akuanan.

⁹ Ami na abhorogh nyen aguola anwani ta emar ebura ma ibura ya awa ta edigh edim obigh.

Awa oguri dọ ma asighal dawa ma ya ipe ya osorogi adiel, bọdọ okelegian agoli, na ige, na ikuta, na ibolo, ya ubhin agol bọdọ idiar ya na emu ulem, ya ibom abua.

¹⁰ Kpelemini, bha ero ma anwani ya na egir ibebi ya izuzuan irema aguọ awa na obuom Aziba bho.

¹¹ Aniebhom aro bọbom atughan da okirimeni ozu.

¹² Ami ibhorogh dọ ma aguọ ola aniebhom ta atughumeni ma atughumeni, bọdọ ta aragha ma alimon arileghom olobhiri oni, yaa aro bọbom.

¹³ Iloghome maa, Aziba adia alem Adam kisa alem Ivu.

¹⁴ Adam dọ ma oni wa ugelemini bho, yaa aniebhom bho, sa ina agir ikarabh.

¹⁵ Aro ku ma okua eka, ina ta aten da imara, kugba maa ina abhin ologi imara, na etulan, na onyen ologi doyo da Aziba agiom da edia, da osibhom ozu.

3

Amarugh ya ikpe ma ogbo irileghom da Asosi

¹ Onon akikiom ola adigh esi, maa: Oni ola na ebhir oten oni irileghom asosi, bha na abhorogh obebi ogir.

² Okua adighi beleni, ekal aliom oro dọ ma oni irileghom, abhin onin ani, akimeni ma ozu, atotogiom amarugh, ologhom abar, adigh edim, ada ma isuloma abhin na onyen ologi, atughumeni na emar,

3 oro do ma oḍamin, oponoma do ma oni, kpeleṃeni aro ma okimakima oni, oni ola oḃem do, oro do ma ola eḍogh okpoki.

4 Ina aro ma oni ola na amar na arileghom eghun otu doyo, sa na aḍighi ma aguṵ ola anwiiny doyo na enagha ma onuokpe, sa na erugh amarugh ozuruna eghoi.

5 Yaa, kugba maa oni na orue do ma orileghom eghun otu doyo, ka ina ta aḍighi eka aloghom aguṵ okponom asosi ta Aziba.

6 Ina oro do ma ororua oni-ituṵnom ta Akraist, boka ina na oḃughuṃeni ma ozu amel onin emel wa udin usobh ase ubhumeni ma Eru bho.

7 Obebi amarugh doyo agba ina aleriom anwunom ya ogi do ma asosi, boka ina na omel aḍigh arighel, sekina osor ete ikpati ta eru bho.

Amarugh ya ikpe ma Ogbo Itotogi da Asosi

8 Onin aguṵ bho ogbo itotogi da asosi, ero ma anwunom ya na erugh adol ya anwunom ta ezuruna ma eghoi enigha. Awa oro do ma ogbo igeleṃeni, bodo roda ma amin, bodo ogbo ya na ebhorogh otei ikarabh asuo.

9 Awa ebhin eḃabala eloghomaṇ esibhom imara ologi ilologian bho.

10 Oda okpon anwunom ya okua, kisa ero ma ogbo itotogi asosi kugba ma ekaḷ ola oliṵm bo.

11 Anwani dawa eka erugh adol ya ikpe ma iya ta ozuruna ma eghoi, ogbo imeghenyan do. Awa ero ma ogbo ya na ekimeni ma aruzu, sa na ebhin da igielake na egir kabar kabar.

¹² Oni itotogi da asosi anwuna ma onin ani, aro ma oni ola na amar na erileghom anwiiny doyo, na otu doyo.

¹³ Anwunom ta ezuruna ma eghei enigha ma ogbo itotogi da asosi ya na emar na egir ogir dawa. Sa awa ta enwuna ma obom alukpo ologi da imara ologi da awa da Akraist Azizos.

Ezin Alebh ta Apol

¹⁴ Aguo ami na age ma alebh onon na aruom anwa bho, bha na ebhir ami ma onur oru ra ozuan oyom.

¹⁵ Yaa, ka ami ibia ma oru, aguo ola anwa ta aloghom aguo anwunom ikpe ma orugh da otu ta Aziba, wa aro ma asosi ta Aziba gai bho, wa odi da aghudum bho, wa aro ma eko na ode agiagai bho.

¹⁶ Yagiagai, onuokpe wa Aziba amutiom aleriom iyar bho obom ilologian:

Akraist aru da ipulupul ozu,

sa Emugh Etutu bho agba amutiom maa, ina

amar arugh da amisigh ta Aziba,

sa itileduom ta Aziba ibigh ina,

sa ugba ina umutiom da esadio anwunom,

sa anwunom emaranwunom bho imara ina,

sa ukpobh ina ubhuneni da otenainy da isosorogian.

4

Ogbo Atughumeni Igunugha

¹ Emugh Etutu bho amar agba amutiom maa, da rekunuguma adama bho, idi anwunom ta

etibara edua da ologi imara bho, sa ta enagha ma arumugh igunugha na itughumeni aruru.

² Wa ibhelebbel igbamigunugha na adighi ma ola eloghoman bho na asa ma arighel awa bho.

³ Awa ibhin ma owalan ilom bha etutu, sa na edin ode idi radien ya Aziba alem aguo ola anwunom ogbo ya imara bho ta eda ebhin na alisebh sa ta eleriom yagiagai bho.

⁴ Kabar kabar Aziba alem, okua adighi beleni, iyar oghel do ma odi abar ise, yaa oda obhin na alisebh.

⁵ Ezin bho, onuokpe ta Aziba na asiseiny na ebalalameni ma edian bho.

Obebi Obaramotu ta Azizos

⁶ Kugba maa anwa atughumeni ma idiar inyen ma arumor na arumarani, bha anwa oten obebi obaramotu ta Akraist Azizos, oni ola onuokpe ologi imara bho, na ibebi itughumeni ya anwa ibhin onyen ologi inagha bho, imuzo da ozu.

⁷ Yaa, ko onwuna ma abar agboloma ma ikarabh asugbagba na idudul ya emirobh. Kpelemenitughane ma orugh aghudum ola ta anigha ma Aziba ma itutumeni.

⁸ Oselegi ma ozu da idiar ya ta elogh aguo, yaa orugh amarugh oghilan Aziba da ebila rekai ya ta elogh aguo. Isibhe ma oguan isen oghudum onon na wa na aru bho.

⁹ Onon agai atughumeni ola akpe konikoni ma omar oda obhin.

¹⁰ Ebula okua sa iyar na owian na ogir ibom, ezin bho iyar na obhin Aziba wa odi da aghudum bho na obem ologi, ina bha Witenemeni ebila anwunom bho, okunukun ogbo ya imara ina bho.

¹¹ Kparameni ma agba ma idiar inyen anigha awa, ma atughumeni awa nyen.

¹² Ko omara ka oni ta adin aguo anwa iro ma okubh oni bho akpon anwa akirimeni. Yaa, rughe ma adol ya ipan ogbo imara bho ta eta, da afugh onu na odighi idiar doyum, da etulan doyum, da ologi imara doyum, na da ebabala ologi doyum.

¹³ Kisa ami ta aru, bha bhine ghan ma obhel asen Adire Etutu bho da akokodian, kikiome, ma atughumeni.

¹⁴ Ko oghel enigha emugh wa odi na anwa bho, wa unigha nyam igiel bho ikei bho igbamagi ma aruguo dawa da ozu doyum, iwa igboloma bho.

¹⁵ Ruruane ma agboloma ma idiar inyen, boka eloloma ogir doyum emite ma ola konikoni ta abigh

¹⁶ Mare ma akpona ma odighi idiar doyum na atughumeni doyum. Ro ma ogir ogir idiar inyen, ezin bho, ka anwa igir okua sa anwa ta atenemeni ma ozu doyum na anwunom ya na enagha nyam bho.

5

*Aguo obhin orugha ogbo ya
odi da onin imara ologi bho*

¹ Ko obhin igam akikiom ikei oni, kpelemen kponeni ma ologi doyo ma aguo owede. Kikiome ma ikubh-anwiiny aguo arumor.

² Rughane ma ikei anwunom anwani ma aguo ronweni, ikubh-anwinyan ma aguo arumarani, da ebabala ma aguo ola anwa ko opioghom do awa da ebla rekai.

³ Loghe ma aguo ma anigha ma rekpukele anwani ya iro ma rekpukele anwani gai.

⁴ Yaa, kugba maa ekpukele ani anwuna ma anwiiny bodo anwiiny ighala, bha awa ekponom ina, ezin bho ina na adia akponom awa, sa ogir okua abhon da amisigh ta Aziba.

⁵ Yaa, ekpukele ani ola aro ma ekpukele ani gai, ya onwuna do ma oni ologh aguo, bha na abhin Aziba na abem ologi, sa na abhin da amane na aro ma asiseiny asiseiny adugalan na etitan, na apuru ina ma ologh aguo.

⁶ Yaa, ekpukele ani ola anigha ma ozu doyo ma ememem emaranwunom onon, bha na amugh, aro ku ma ina odidia da aghudum eka.

⁷ Kikiome awa ma rakikiom inyen boka ubigh abar eka obhin oliom awa.

⁸ Yaa, oni ola orue do ma okponom ogbo aghisian doyo, okunukun anwunom eghunotu doyo, bha oni bho na akua ma imara ologi bho sa agurom apu ma oni ola omara do ma Akraist.

⁹ Ko oge ma adien ekpukele ani ma alogh da adire rekpukele anwani bho, aten ola onu ala bho na epel erabharabh (60), ola awal owolom doyo kukum, sa ode do ma ema.

¹⁰ Ina aro ma ani ola adigh edim da amisigh ebla ogbo sa ugba ma ibebi ogir doyo, sa amar arughom anwiiny doyo, sa anwuna ma onyen ologi ola okioghom risuloma, na otitologh asike anwunom ta Aziba, sa alogh ghan aguo anigha ma ogbo ya odi da ikparama adol, sa anwuna ma obhel anigha ma adien kere kere ogir ibebi.

¹¹ Ko ologh aridien rekpukele anwani ya odidia

ma ikubh, ikparakpar rebhiroma ozu dawa ta epel iya awa inwuna igboloma ma Akraist bho, sa ta ebhorogh omula owal ilom,

¹² sa awa ta etej ebhum ase ma aguo awa osibh do ma opur oguan awa bho.

¹³ Da onin obhel bho, awa ta eten igbuorogbuor, sa ta erugh radol ya odu otu otu. Ka oro do ma igbuorogbuor kukum, yaa ta eten ogbo imeghenyan, na radikelekpum, efughogh idiar ya okpe do.

¹⁴ Okua adighi beleni, ami na akikiom aguo ola ikubh rekpukele anwani ta emula ewal ilom, emaragi ma anwiiny, ekponom arutu dawa. Sa oni ologian adien bho ko onwuna do ma ezin ola odin ofugh ikarabh ogboloma awa.

¹⁵ Ibighe ma isen da idi awa na ebaron edua na etuonon Eru bho.

¹⁶ Kugba maa, ani ola na amara ma Akraist anwuna ma ogbo aghisian ya iro ma rekpukele anwani, bha ina alogh aguo akponom awa. Oweleman do ma adol bho anigha ma asosi bho kukum, boka asosi bho ekponom agai rekpukele anwani ya ikpe bho.

¹⁷ Ikei ya na emar na erileghom asosi bho ekpe ma otei asuwo iwal abin, okunukun ogbo ya na ekparameni na egba ma Ibebi Asugbagba bho na esasaragi, sekina ogbo ya na etughumeni bho.

¹⁸ Ezin bho, Adire Etutu bho agba maa, "Ko oghorogi ma akpegi ma onu enam ogir bho ma igiel ina na azeregi na akagion ikpo edian bho." Opan esi eka sa agba maa,

“Oni ogir akpe ma otei asuwo ogir doyo.”

¹⁹ Ko onagha ma iku ola uler ugboloma ma okei-oni, aten ka iwal oni bodo isar oni iru ra igba ma onyoba onin onu.

²⁰ Yaa, game ma anigha ma ogbo ya na egir ikarabh bho da amisigh ebila ogbo, boka adigh arugugu anigha ma ipan ogbo.

²¹ Ami na abhin okparakpar okoroko na akikiom anwa da amisigh ta Aziba, na Akraist Azizos, na itileduom ta Aziba ya ina na ason bho, ma aguo ola anwa ta abhin da igielake atuonon itotogi inyen, yaa oro do ma ola anwa ta abhel odi akpon odi agurumeni.

²² Ko onugian ogbamagi aruguo da aruzu anwunom da oson ogbo adilade, boka anwa na odigh arugian ikarabh ipan ogbo. Yaa, rughe ma adol doyom aguri da ehabala.

²³ Ko oda ma amum kukum, yaa, da ma ikikara amin da ebula okurogh doyom, na rasunwer ya na edua ma obhel na eten obhel na enweremeni nyam bho.

²⁴ Ikarabh idi ogbo odi ma iya na ologhom na obigh geregere, sa na ebhin awa ka edighom da ebhum ase. Yaa, ikarabh idi ogbo na etuonon awa da aman.

²⁵ Onin aguo bho, ibebi ogir na ero geregere. Yaa, ibebi ogir ya odi da ewogina bho eka, ko orue do owogi.

6

¹ Ogbo ya odi ma arubana eloghom maa akpe awa ma ozuruna eghoi onigha ogbo ya inwuna

awa bho. Okua ta adighi ma ola anwunom ko ofugh do ma afugh ibasi egboloma ma adien ta Aziba na atughumeni diyar.

² Arubana ya ogbo ya inwuna awa bho iro ma anwunom da onin imara ologi bho, okpon do awa ekirimeni, ezin bho awa arumor na arumarani dawa. Kpelemenì bha awa egir epeleni enigha awa, ezin bho ogbo ya na eteì asuwo ogir dawa bho bha ogbo etulan ya odi da onin imara ologi bho.

Atughumeni Igunugha na Agai Elila

Tughumeni awa ma idiar inyen ma akpomeni ma rologi dawa ma ogir okua.

³ Oni ola atughumeni ma opan abar ola anwegian na atughumeni igielake ta Wanwuna Azizos Akraist, na atughumeni agai imara ologi diyar,

⁴ bha oni ola na agaga na abughumeni ma ozu, sa ologhom do bebina abar. Ina anwuna ma ikarabh ebhiroma okuanan kabar kabar ola ufugh usoroni. Sa obha na amutiom agbokian, na elobhiri, na afugh iteì, na igurumian ologi,

⁵ na iwan da anwunom ya inwuna ma ikarabh rologi ya na edua da agiagai bho. Awa ibhin maa otuonon Aziba maa eten owol ogbo elila.

⁶ Yaa, adol igielake na orugh aguo ola idiar ya oni ateì ta eleghan oni, na ebhin ibom asuo na eruom oni.

⁷ Abar ola iyar ubhin uru da emaranwunom onon bo, sa bebina abar ola iyar ta orue obhin odua bo.

⁸ Okuā adighi beleni, kugba ma iyar otei edian ode na ibura ologian ma isen, bha inyen eleghan iyar.

⁹ Yaa, anwunom ya na ebhorogh ogbo elila na emel na edigh da adagian, na akpatian, na adizo ikarabh iwalama ibhobho ikpo ya adugh, ya ta orobh awa odighom da egbika okunugi awa.

¹⁰ Ezin bho otulan okpoki na amutiom ebla ikarabh odighi idiar. Idi ogbo da adien aguo na ewian otei bho, na ebhe da ologi imara bho ka edigh da ibom ikunu.

Ekunuguma Akikiom bho

¹¹ Yaa, anwa Atimoti oni ta Aziba, ghele ma okpo iye. Kpelemini, wiane ma arugh adol igielake, na aghudum oghilan Aziba, na ologi imara, na etulan, na amane, na okirimeni ozu.

¹² Wiane ma ibom da ologi imara bho ma atei aghudum kidudul wa Aziba abhelegi nyam ra adighom bho, wa anwa igba imutuma da amisigh adizo ogbo ma anwa ta atuonom bho.

¹³ Ami na aruom anwa da amisigh ta Aziba wa na anigha ma aghudum ebla idiar, na Azizos Akraist wa amara da amisigh ta Apontios Apaillet agba ma iyagiagai agboloma ma ozu doyo bho,

¹⁴ ma aguo ola onagha onuokpe oloko bho boka upie nyam, oliom do nyam, tutun Wanwuna Azizos Akraist ta amula aru,

¹⁵ da agai obhel wa Aziba itutumeni bho, wa ina kukum aro ma Wirileghom bho, na Olilema ta Arulilema bho, na Wanwuna ma ogbo ya inwuna bho, ta ato bho.

¹⁶ Yagiagai, ina kukum ola ko omugh do, sa na arugh da esi ebalabal ola oni ko orue do atuan. Onyiomoroni ola na adia abigh ina bo, sa oni ola ta arue abigh ina bo nyen. Edim na alimon ya opur obeton na ekunuguma oto, ero enigha ina. Aro ma okua.

¹⁷ Ghaghana ma ogbo ya igbo ma elila da idiar emaranwunom onon bho maa, awa obughumeni do ma aruzu bodo obhin do ma elila ya na ekpokolo ebem ologi. Kpelemen bha ebem ologi dawa aro da Aziba wa na abhin da onyen ologi na anigha iyar ebla idiar enum bho.

¹⁸ Ggba ma anigha awa ma egir ibebi, egbo ma ibome elila da ibebi odighi idiar, enwuna ma onyen ologi, eneghe na onyen ologi.

¹⁹ Ka awa igir okua bha awa na ekepol elila iya awa, ya ta ero ma obebi odeoma da edia, boka awa etei agai aghudum bho.*

²⁰ O Atimoti, mare ma asibh abar wa ubeton ulogh da aguo do yom bho. Ko onagha ma ibhelebbhel afugh, bodo, iberegian na akuanan ya odigh do ma esi ya idi ogbo na ekue na ebhelegi ma "elohomabar."

²¹ Idi ogbo na ebhin erema ma ola na emel edua da ologi imara bho.

Eneghe ta Aziba aro na ebla inyin.

* **6:19 6:19** Apol na otughumeni do maa, ogir ibebi na abhin itenemeni emugh na aru. Akikiom bho agboloma ma ogbo ya na etei itenemeni da emugh.

Abureni NT Portions

Abureni: Abureni NT Portions (New Testament)

copyright © 2022 Luke Initiative for Scripture Translation and The Seed Company

Language: (Abureni)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 26 Jul 2025 from source files dated 2 Jul 2025

da8f49e1-c3f7-5ace-89bc-41f9f7389321